

## JIHAD DI SYRIA: ISU PENYERTAAN WARGA MALAYSIA

### Mukaddimah

Mutaakhir ini kita telah mendengar isu jihad di bumi Syria dan juga Iraq lebih-lebih lagi wujudnya ISIL yang telah menubuhkan Khilafah Islamiyyah di Iraq dan Syria.

Dr. Yusuf al-Qaradhawi dalam Fiqh al-Jihad telah membahagikan tiga golongan mereka yang melihat isu jihad dari pelbagai aspek, antaranya, golongan yang mengisytiharkan perang terhadap dunia, beliau berkata: *"Sesungguhnya pemikiran yang begini mempunyai pengaruh yang buruk terutama bagi para pemuda yang mempunyai niat yang ikhlas. Lantas mereka mengangkat senjata kepada bangsa dan keluarga sendiri sehingga mereka terbunuh. Mereka menganggap bangsa dan keluarga mereka sebagai kelompok orang kafir yang harus diperangi kerana murtad daripada Islam. Golongan fanatik ini terus melemparkan tuduhan kafir terhadap orang yang bercanggah pendapat dengan mereka sehingga golongan ulama turut dikafirkan. Mereka tidak peduli dengan golongan tidak berdosa yang membunuh sehingga Islam dilabelkan sebagai agama kekerasan."*

### Definisi Jihad

Jihad daripada sudut bahasa adalah masdar kepada jahada yujahidu, jihadan dan mujahadatan

Jihad berasal daripada perkataan jahada, yajhadu, dan jahdan. Sebagai contoh, kamu berkata: جَهَدَ الرَّجُلُ فِي كَذَا maksudnya: Seseorang itu bersungguh-sungguh melakukan sesuatu dan جَهَدَ الرَّجُلُ ذَابْتَهُ maksudnya: Seorang lelaki membebaskan binatangnya dengan barang yang di luar kemampuan binatang itu. Contoh ini terdapat dalam Mu'jam Alfaz Al-Quran Al-Karim.

Kemudian, dalam mu'jam itu menyebutkan lagi: al-jahdu dengan baris atas pada huruf jim adalah kata nama dan al-juhdu, iaitu baris dhommah pada huruf jim adalah sebutan bahasa.

Jihad dan mujahadah beerti mencurahkan tenaga bagi menentang musuh. Terdapat tiga bahagian dalam jihad:

- Jihad melawan musuh yang jelas
- Jihad melawan syaitan
- Jihad melawan nafsu

Ketiga-tiga bahagian ini termasuk dalam ayat:

وَجَاهِدُوا فِي اللَّهِ حَقَّ جِهَادِهِ

Maksudnya: Dan berjihadlah kamu pada jalan Allah dengan jihad yang sebenar-benarnya.

(Surah al-Hajj: 78)

Dalam *al-Fiqh al-Manhaji* menyebut: Jihad dalam bahasa Arab ialah kata nama terbitan daripada *jaahada* yang bermaksud berusaha gigih untuk mencapai sesuatu matlamat.

Jihad menurut istilah syariat Islam ialah berusaha gigih untuk menegakkan sebuah masyarakat Islam dan meletakkan kalimah Allah di tempat yang tertinggi, seterusnya membawa syari'at Allah untuk memimpin seluruh alam.

Secara kesimpulannya, jihad beerti, seseorang Muslim yang mencurahkan tenaga dan kekuatan bagi menentang kejahatan dan membuang kebatilan bermula daripada membuang kejahatan dalam diri dengan menolak godaan-godaan syaitan. Mekanakala yang keduanya, jihad dengan menentang kejahatan yang berlaku dalam masyarakat sekeliling di mana ia berada sekadar mana yang termampu.

### Kategori Jihad

Berdasarkan pengertian jihad yang dinyatakan di atas, jihad boleh dibahagikan kepada beberapa kategori seperti berikut:

- Jihad melalui pendidikan, penyebaran kesedaran Islam dan menolak segala salah faham yang menghalang manusia daripada beriman dan memahami hakikat Islam yang sebenar.
- Jihad dengan menyumbang harta benda untuk menampung keperluan ke arah pembentukan sebuah masyarakat Islam yang diimpikan.
- Perang berbentuk mempertahankan diri, iaitu apabila masyarakat Islam berdepan dengan serangan daripada musuh yang cuba menggugat agama Islam.
- Perang berbentuk menyerang, iaitu apabila masyarakat Islam memulakan serangan untuk menyebarkan dakwah Islam kepada masyarakat lain di negara lain dan pemerintah negara tersebut pula menghalang daripada disampaikan kebenaran kepada rakyatnya.
- Kerahan tenaga ketika musuh menyerang negara Islam dan menggugat agama, bumi dan kebebasan beragama umat Islam.

Dengan ini, pengertian yang dapat merangkumi kesemua kategori jihad ini ialah berusaha sedaya upaya untuk memartabatkan syariat Allah dan menyebarkan kalimah-Nya ke seluruh muka bumi.

### Pendapat Ulama

Ramai tokoh tidak mengizinkan umat Islam dari Negara lain berjihad di bumi Syria terutamanya suasana mutakhir ini yang sudah menjadi caca merba. Antara tokoh tersebut ialah:

## 1. Syeikh Abdullah Musthafa Rahhal (Ketua Rabitah Ulama Idlib, Syria)

- Ramai generasi muda dari beberapa Negara seperti Malaysia dan Indonesia terbabit dalam peperangan yang sebenarnya tidak mengikut cara jihad dalam Islam.
- Generasi muda itu juga tidak benar-benar faham bahasa Arab dan keadaan semasa di sana sehingga mendedahkan mereka kepada manipulasi ISIL yang sebenarnya datang dari luar Syria atas sebab dan perjuangan yang kabur walaupun mendakwa diatas nama Jihad.
- Semangat yang berkobar-kobar apabila dibakar dengan jihad mendorong mereka untuk untuk menyertai kumpulan yang sebenarnya tidak berjihad atas nama Islam.
- Generasi muda dari Malaysia dan Indonesia dinasihatkan tidak menyertai peperangan di Syria kerana dikhuatiri terpesong.
- Situasi di Syria. Walaupun datang dengan tujuan baik dan semangat yang berkobar-kobar, niat mereka mungkin terpesong kerana dangkal dengan selok belok dan situasi di Syria sehingga mendorong mereka terjebak dalam kancah peperangan yang tiada kaitan dengan jihad.
- ISIL didapati menggunakan nama-nama ulama palsu yang sebenarnya datang dari Negara lain termasuk Rusia dan Iran atas tujuan yang tidak jelas status jihadnya.

## 2. Syeikh Muhammad Said Ramadhan al-Buti

Seorang ulama yang terkenal digelar sebagai *Syahid al-Mihrab* berpendapat, antara kenyataannya:

- Sejak awal, kita seharusnya berwaspada dan mengikut segala saranan Rasulullah SAW yang menyuruh umatnya menghindari tindakan menimbulkan tragedi seperti ini dan menjauhi daripada "berjihad" di atas *rayah 'ammiah* iaitu di atas dorongan mereka yang kita tidak kenali dan ketahui tentang apakah tujuan mereka menimbulkan huru-hara ini. Jika kita berwaspada tiada sesiapa pun yang akan terkorban dan membawa kepada malapetaka ini.
- Namun adakah seorang yang cerdik dan berakal waras sanggup menjual atau memusnahkan negara ini semata-mata untuk membetulkan kesalahan yang dilakukan oleh pihak kerajaan? Apakah kamu berharap dapat membetulkan kesalahan-kesalahan pihak kerajaan, tetapi pada masa yang sama kamu telah hilang sebuah negara yang bernama Syria yang bersejarah ini? Bukankah kamu akan bersama saya untuk menangis kesedihan sebagaimana yang disifatkan dalam sebuah syair:

“Hari ini, mungkin kamu menangis kerananya, namun  
Bila ia berada pada milik orang, nescaya kamu menangisinya pula”

- Sepatutnya kamu boleh memberi bantuan kewangan kepada orang yang susah dan mendamaikan pihak yang bertelagah. Kewajipan sekarang memberi bantuan pertolongan atau sumbangan yang diperlukan.

### **3. Syeikh Usamah Rifaie (Tokoh Ulama Terkenal Syam)**

Beliau berpendapat tidak perlu pemuda dari Malaysia menyertai misi jihad tetapi hanya misi kemanusiaan untuk makanan, minuman dan ubat-ubatan.

### **4. Syeikh Muhammad Muwaffaq al-Murabi' (Naib Mudir Maahad al-Fatah Islami)**

Beliau berpendapat tidak sayugia pemuda Malaysia datang ke bumi Syria untuk berperang tetapi lebih utama memberi bantuan kemanusiaan.

### **5. Syeikh Muhammad Husin Kanu, salah seorang ulama di Syria**

Beliau sependapat seperti di atas yang pihak orang Islam di Malaysia bahkan dari negara lain tidak perlu terbabit dalam berjihad di bumi Syria.

### **6. Dr. Ali al-Qaradaghi (Setiausaha Itfihad al-'Alami li Ulama' al-Muslimin)**

Jihad di Syria adalah jihad yang meragukan kerana keadaan yang tidak menentu di sana dan pengangkatan senjata tidak mendatangkan manfaat dalam isu ini. Beliau menyeru kepada jihad yang membantu dari sudut kewangan dan kemanusiaan.

### **7. Dr. Abdul Aziz Hanafi (Pensyarah Kuliyyah Syariah dan Undang-Undang, KUIN)**

- Menyokong kenyataan yang dikeluarkan oleh Syeikh Abdullah Musthafa Rahhal, Ketua Rabitah Ulama Idlib di Syria.
- Apa yang dikatakan oleh Syeikh Abdullah Musthafa Rahhal boleh dijadikan iktibar oleh belia Malaysia yang mungkin ghairah apabila mendengar seruan jihad, sedangkan mereka mungkin membunuh dan merosakkan lagi keadaan tanpa faham situasi dalam sebuah Negara yang bergolak.

### **Kenyataan Mufti Wilayah Persekutuan**

Berdasarkan pengamatan dan perbincangan dengan NGO Islam yang terlibat secara langsung membantu dan melaksanakan misi kemanusiaan di bumi Syria jelas menunjukkan bahawa yang utama dan lebih penting bantuan makanan, minuman dan pakaian serta ubat-ubatan lebih dialu-alukan berbanding dengan berjihad di sana. Antara asas yang kukuh perlu difahami oleh umat Islam ialah:

- Fiqh Aulawiyat (Fiqh Keutamaan) yang perlu difahami.
- Memulakan dengan berbakti dan berkhidmat kepada ibu bapa adalah diutamakan berdasarkan hadis Nabi SAW.

جَاءَ رَجُلٌ إِلَى النَّبِيِّ فَاسْتَأْذَنَهُ فِي الْجِهَادِ فَقَالَ: أَحْيَى وَالِدَاكَ؟ قَالَ: نَعَمْ، قَالَ:  
فَفِيهِمَا فَجَاهِدْ.

Maksudnya: "Datang seorang lelaki kepada Nabi SAW, lalu ia meminta kebenaran daripadanya untuk berjihad. Maka Baginda bertanya kepadanya: Adakah ibu bapa engkau masih hidup? Dia menjawab: Ya! Baginda bersabda: Maka hendaklah berbakti pada keduanya dikira engkau berjihad."

Riwayat al-Bukhari (3004) dan Muslim (6668)

Kelebihan jihad dan berbuat baik kepada ibu bapa. Berbuat baik kepada ibu bapa lebih baik dari jihad. Allah SWT memerintahkan kepada kita untuk berbakti kepada kedua ibu bapa seperti yang dinaskan di dalam al-Quran:

وَقَضَىٰ رَبُّكَ أَلَّا تَعْبُدُوا إِلَّا إِيَّاهُ وَبِالْوَالِدَيْنِ إِحْسَانًا ۖ إِمَّا يَبُلُغَنَّ عِنْدَكَ الْكِبَرَ  
أَحَدُهُمَا أَوْ كِلَاهُمَا فَلَا تَقُلْ لَهُمَا أَفٍّ وَلَا تَنْهَرُهُمَا وَقُلْ لَهُمَا قَوْلًا كَرِيمًا ﴿23﴾

Maksudnya: Dan Tuhanmu telah perintahkan, supaya Engkau tidak menyembah melainkan kepadanya semata-mata, dan hendaklah Engkau berbuat baik kepada ibu bapa.

(Surah al-Isra': 23)

Sayid Qutb dalam *Fi Zilal al-Quran* berkata: "Hubungan pertama selepas hubungan akidah ialah hubungan keluarga. Oleh kerana itu, penjelasan ayat ini menghubungkan kewajipan berbuat baik kepada ibu bapa dengan kewajipan menyembah Allah untuk menerangkan betapa tingginya nilai berbuat baik kepada ibu bapa itu di sisi Allah SWT."

- Suasana sekarang yang mempunyai pelbagai puak dan pertempuran berlaku sesama sendiri, hal ini sepatutnya dihindarkan oleh umat Islam dalam memelihara darah mereka.
- Isu kebuluran kerana ketidakcukupan makanan dan ubat-ubatan amat mendesak kepada jutaan rakyat Syria. Justeru bantuan barangan tersebut lebih diutamakan.
- Menimba ilmu dan memakarkan diri dalam pelbagai bidang dan cabang ilmu adalah amat penting lebih-lebih lagi untuk menyelesaikan isu kecelaruan pemikiran hasil daripada serangan *al-ghazwul fikri*.
- Para ulama Syria di sana begitu bertegas yang keperluan utama adalah bantuan kemanusiaan bukan dengan jihad.

Sejarah Rasulullah SAW di Kota Mekah dan Madinah juga cukup untuk menjadi bukti bahawa **keputusan tentang jihad hanya berada di bawah kuasa pemimpin dan tidak harus untuk menjerumuskan orang Islam ke dalam bahaya yang akibatnya tidak diingini.**



Akhir kalam, marilah sama-sama kita berganding bahu dalam menegakkan syiar Islam dengan penuh hikmah yang disulami dengan ilmu serta dada yang penuh dengan sifat terbuka dan toleransi. Jauhkan diri kita daripada terikut-ikut tanpa memahami akan sesuatu dengan jelas.

Akhukum Fillah,

**Dr. Zulkifli Mohamad Al-Bakri**

**Mufti Wilayah Persekutuan**